

2 Aperila, 2018

Mo: Au Pulega Aoao; Au Peresitene Aoao o Ausilali; Fitugafulu Eria; Peresitene o Siteki, Misiona, ma Itu; Epikopo ma Peresitene o Paranesi; Aufono a Uarota ma Siteki

*(Ia faitau atu i le sauniga faamanatuga)*

Uso e ma Tuafafine Pele:

Auaunaga faatasi ma Korama a le Au Perisitua Mekisateko ma Aualofa ua Faamalosi

O le auaunaga a le Faaola o loo faaalua mai ai ia poloaiga sili e lua: “E te alofa atu i le Alii lou Atua ma lou loto atoa, ma lou agaga atoa, ma lou manatu atoa” ma “E te alofa atu i lē lua te tuaoi, ia pei o oe lava ia te oe” (Mataio 22:37, 39). I lena agaga, sa aoao mai ai foi Iesu, “O outou ia o e ua ou filifilia e auauna atu i lenei nuu.” (3 Nifae 13:25).

Ina ia faataulai atu taumafaiga a korama a le Au Perisitua Mekisateko ma Aualofa i auaunaga e pei ona aoao mai e le Faaola, matou te faasilasila atu ai fetuunaiga nei:


- **I le uarota, e tasi le korama a le au Perisitua Mekisateko.** Ua tuufaatasia nei uso o korama a toeaina ma vaega o faitaulaga sili i le korama e tasi faatasi ai ma le au peresitene e tasi. Ua atofaina la le korama o le “korama a toeaina,” ma ua faamutaina nei vaega a faitaulaga sili i le uarota.
- **I le siteki, e tasi le korama a faitaulaga sili.** E faaaauu pea ona avea le au peresitene o le siteki ma au peresitene o le korama a faitaulaga sili a le siteki. O uso o lena korama ua na o faitaulaga sili o loo auauna atu i le taimi nei i le au peresitene o le siteki, i au epikopo, i fautua maua, ma peteriaka o loo galulue.
- **O le auaunaga (ministering) ua suia ai nei faiaoga o aiga ma faiaoga asi.** O polokalama eseese o faiaoga o aiga ma faiaoga asi ua avea nei ma se taumafaiga tuufaatasi ua faasino atu nei i ai o le “auaunaga (ministering),” e vaavaaia e au peresitene o korama a toeaina ma Aualofa i lalo o le taitaiga a le epikopo. O le auaunaga o le tausiga FaaKeriso lea mo isi ma fesoasoani e faafetaia’ia o latou manaoga faaleagaga ma faaletino.
- **Ia faaaofia le autalavou i le auaunaga (ministering).** O le auaunaga e mafai ona faaaofia ai ma Lora ma Maia Maite e fai ma soa i tuafafine o le Aualofa, ma ositaulaga ma aoao e faaaauu pea ona avea ma soa i e umia le Perisitua Mekisateko.

O fetuunaiga o korama e tatau ona vave faatinoina. O fetuunaiga i auaunaga e ono alu ai se taimi ae e tatau lava ona faatulagaina i le vave e mafai ai. O loo maua nisi faamatalaga faaopoopo i le [ministering.lds.org/smo](http://ministering.lds.org/smo).

Ma le faamaoni lava,

  
\_\_\_\_\_

  
\_\_\_\_\_

  
\_\_\_\_\_

O Le Au Peresitene Sili

# Auaunaga faatasi ma Korama a le Au Perisitua Mekisateko ma Aualofa ua Faamalosia

O LE EKALEZIA A  
IESU KERISO  
O LE AU PAIA O ASO  
E GATA AI

O mea ua auina faatasi atu ma le tusi a le Au  
Peresitene Sili o le aso 2 Aperila, 2018.

---

Ua faaalua mai i le soifuaga ma le auaunaga a Iesu ia poloaiga sili e lua: “E te alofa atu i le Alii lou Atua ma lou loto atoa, ma lou agaga atoa, ma lou manatu atoa” ma “E te alofa atu i lē lua te tuaoi ia pei o oe lava ia te oe” (Mataio 22:37, 39). I le avea ai ma tagata o le Ekalesia a le Faaola o loo mananao moni lava e avea ma Ona soo, e tatau ona tatou mulimuli i Lana apoapoaiga ia alolofa atu ma auauna atu i lo tatou Tama o i le Lagi ma Ana fanau. “Afai e te alofa mai ia te a’u e te auauna mai ia te a’u,” sa fetalai ai le Faaola (MF&F 42:29). Sa aoao mai le Tupu o Peniamina, “Pe a outou auauna atu i o outou uso-a-tagata, ua nao lo outou auauna atu lava lea i lo outou Atua” (Mosaea 2:17). Sa aoteleina e Alema lo tatou tiute e ala i le tusiaina, “Sa latou leoleo i luga o lo latou nuu, ma fafaga i latou i mea tau i le amiotonu” (Mosaea 23:18).

Ina ia fesoasoani ia i tatou taitoatasi ia tali atu i le tiute paia e tausi ma auauna atu i isi, ua faasilasila atu ai e le Au Peresitene Sili ia fetuunaiga nei, ua mamauina e taulai atu i taumafaiga a korama a le Au Perisitua Mekisateko ma Aualofa e uiga i le auaunaga e pei ona sa faia e le Faaola. O nei fetuunaiga ua aofia ai mea nei:

- **I le uarota, e tasi le korama a le au Perisitua Mekisateko.**
- **I le siteki, e tasi le korama a faitaulaga sili.**
- **O le auaunaga (ministering) ua suia ai nei faiaoga o aiga ma faiaoga asi.**
- **Ia faaaofia le autalavou i le auaunaga (ministering).**

I le lagolagoina o nei fetuunaiga, e le toe faia ai e uarota ma siteki ni fonotaga a komiti a taitai perisitua. Afai e tulai mai ni mataupu faapitoa a uarota, e pei o se mataupu maaleale faaleaiga po o se luitau faaleulefea e le masani ai, e mafai ona taulimaina i se fonotaga faaumiumi a le au epikopo. O isi mataupu e le maaleale tele e mafai ona taulimaina i le aufono a le uarota. O fonotaga sa ta’ua o “fonotaga a le komiti o taitai perisitua a le siteki” ua ta’ua nei o “fonotaga a aufono maualuga” (tagai i fesili 7 ma le 15 o i lalo).

O loo maua nisi faamatalaga faaopoopo i le [ministering.lds.org/smo](http://ministering.lds.org/smo).

## I le Uarota, e Tasi le Korama a le Au Perisitua Mekisateko

Na aoao mai Peresitene Russell M. Nelson e faapea “e le manaomia ona oo mai faaaliga uma i le taimi e tasi. E mafai ona auaua’i mai.”<sup>1</sup> O mea e faaauau pea ona tutupu e faataata i korama o le perisitua ma se malamalamaaga faatuputupulaia e uiga i ki o le perisitua e maua ai se mamau o faaaliga e auaua’i mai pea. I le talafaasolopito atoa o le Ekalesia, e tele lava ina faaali mai e le Alii Lona finagalo i lea fuaiupu ma lea fuaiupu, ma faasolosolo ona faamanuiaina Ana fanau i le malamalamaaga sili atu i le auala e faaoga ai mataupu faavae o le talalelei i tulaga o loo i ai i le taimi nei (tagai i le MF&F 46:15–16).

I le aluga o se vaiatau o tausaga, sa iloiloaina ai e le Au Peresitene Sili ma le Korama a Aposetolo e Toasefululua ia fetuunaiga o loo faamatalaina atu i lalo. Ua na o le tele o tatalo, suesuega toto'a o faavae faaletusi paia o korama o le perisitua, finagalo autasi o taitai pulefaamalumalu o le Ekalesia, ma le faamautuuga o le finagalo lea o le Alii, ua agai atu ai nei i luma taitai i le toefaatulagaina o korama i le tulaga faaleuaroa ma faalesiteki, i le faia o le isi laasaga lea e tasi i le tupuolaola o le Toefuataiga.

### **1. O a ni fetuunaiga mo vaega o faitaulaga sili ma korama a toeaina i le uarota?**

I uarota, o uso o korama a toeaina ma vaega a faitaulaga sili o le a tuufaatasia nei i le korama e tasi faatasi ai ma le au peresitene e tasi. O lenei korama, o le a faateleina le aofai ma le lotogatasi, o le a faaigoa o le “korama a toeaina,” ma faamutaina ai le vaega a faitaulaga sili.

O le korama a toeaina e aofia ai toeaina uma ma toeaina faolioli i le uarota faapea ai ma faitaulaga sili o e e le o auauna atu i le au epikopo i le taimi nei, i le au peresitene o le siteki, i fautua maualuga, po o peteriaka o loo galulue.

### **2. E faapefea ona faatulaga le au peresitene o le korama a toeaina?**

O le peresitene o le siteki, e lagolago i ai ona fesoasoani, o le a ia faamaloloina le au taitai vaega o faitaulaga sili o i ai nei ma au peresitene o korama a toeaina. Ona valaauina lea e le peresitene o le siteki se peresitene fou o le korama a toeaina i uarota taitasi, ma o le peresitene o le siteki, se fesoasoani ua tofiaina i le au peresitene o le siteki, po o se fautua maualuga ua tofiaina o le a valaauina fesoasoani ua fautuaina e auauna atu i le au peresitene o le korama a toeaina. O le au peresitene fou o le korama a toeaina e mafai ona aofia ai toeaina ma faitaulaga sili, e eseese le matutua ma le poto masani, e auauna faatasi i le au peresitene e tasi o le korama. E mafai ona auauna atu se toeaina po o se faitaulaga sili e avea ma peresitene o le korama po o se fesoasoani.<sup>2</sup>

### **3. O ai e taitaia le galuega a le peresitene o le korama a toeaina?**

O le peresitene o le korama a toeaina e tali sa'o i le peresitene o le siteki, o le e tuuina atu aoaoga ma le taitaiga mai le au peresitene o le siteki ma ala mai i fautua maualuga. O le epikopo, i le avea ai ma faitaulaga sili pulefaamalumalu i le uarota, e fono foi e le aunoa ma le peresitene o le korama a toeaina. E fefautuaai le epikopo ma ia ma tuuina atu le taitaiga talafeagai e tusa ai ma le ala sili e auauna atu ai ma faamanuia ia tagata o le uarota, e galulue felagolagoma'i ma faalapopototoga uma a le uarota. (Tagai i le *Tusitaulima 2, 7.3.1.*)

### **4. Pe o lenei fetuunaiga i le faatulagaga o le korama o le a suia ai le tofi o le perisitua o loo umia e uso o le korama?**

Leai. E tumau pea toeaina o toeaina ma faitaulaga sili o faitaulaga sili e tusa ai ma o latou tofi o le perisitua. Peitai, o le a faaauau pea ona faauuina ia toeaina e avea ma faitaulaga sili pe a valaauina i latou i se au peresitene o le siteki, fautua maualuga, po o le au epikopo—mo isi taimi e fuafuaina ai e le peresitene o le siteki e ala i iloiloaga ma le agaga tatalo ma musumusuga.

### **5. Pe mafai ona sili atu ma le tasi se korama a toeaina i se uarota?**

Ioe. I le agaga o le Mataupu Faavae ma Feagaiga 107:89, pe a oo ina i ai se aofaiga tele e le masani ai i se uarota o e umiaina le Perisitua Mekisateko e toaaga, e mafai e taitai ona faatulagaina e sili atu ma le tasi se korama a toeaina. I tulaga faapena, e tatau i korama taitasi ona i ai se paleni talafeagai i tulaga o le matutua, poto masani, ma tofi ma le malosiaga o le perisitua.

## I le Siteki, e Tasi le Korama a Faitaulaga Sili

### 6. O a fetuunaiga mo se korama a faitaulaga sili i le siteki?

E faaauau pea ona avea le au peresitene o le siteki ma au peresitene o le korama a faitaulaga sili a le siteki. O uso o lena korama ua na o faitaulaga sili o loo auauna atu i le taimi nei i le au peresitene o le siteki, i au epikopo, i fautua mauuluga, ma peteriaka o loo galulue. O failautusi ma failautusi faapitoa o uarota ma siteki e le o ni uso o le korama a faitaulaga sili [a le siteki].

O uso o le korama a faitaulaga sili a le siteki o le a fono soo ma le korama a toeaina pe afai e le o tofiaina i nisi valaauga e ese mai ai.

### 7. O le a le matafaioi a le korama o faitaulaga sili a le siteki?

I lo latou matafaioi pulefaamalumu, e fono le au peresitene o le siteki ma uso o le korama a faitaulaga sili a le siteki pe a manaomia e tuuina atu aoga ma ia fesoasoani i uso o le korama i o latou valaauga. O fonotaga a le siteki o loo i ai i le taimi nei ia o loo faamalamalamaina i le *Tusitaulima 2*, vaega 18.3 e faaauau pea faatasi ma fetuunaiga nei:

- O fonotaga a le komiti taitai o le perisitua a le siteki ua ta'ua o “fonotaga a aufono mauuluga.”
- O le fonotaga faaletausaga a faitaulaga sili uma ua faauuina i le siteki o le a le toe faia. Peitai, e faia e le au peresitene o le siteki se fonotaga faaletausaga a le korama a faitaulaga sili o le siteki.

### 8. O a faamoemoega o fetuunaiga i korama o le Perisitua Mekisateko?

O le i ai o se korama se tasi o le Perisitua Mekisateko i se uarota e tuufaatasia ai i latou e umia le perisitua e faataunuu vaega uma o le galuega o le faaolataga, e aofia ai ma galuega o le malumu ma talafaasolopito o aiga ia na faamaopoopoina talu ai e le taitai vaega o faitaulaga sili. E faatagaina ai uso o le korama o vaitausaga uma ma talaaga ia manuia mai le vaaiga ma aafiaga a i latou i tulaga eseese o le olaga. E maua ai foi avanoa faaopoopo mo e umia le perisitua ua i ai le poto masani e faufautua ai i isi, e aofia ai ma toeaina faaolioli, o uso fou, talavou matutua, ma i latou ua toe toaaga mai i le Lotu.

O nei fetuunaiga o le a fesoasoani i korama a toeaina ma Aualofa e faamaopoopo ai la latou galuega. O le a latou faafaigofieina ai foi le faamaopoopoga a le korama faatasi ma le au epikopo ma le aufono a le uarota. Ma ua mafai ai e le epikopo ona faasafua atu isi mau tiutetauave i peresitene o korama a toeaina ma peresitene o Aualofa ina ia mafai ai ona taulai atu o ia ma ona fesoasoani i o latou tiute autu—aemaise ai le pulefaamalumu i le Perisitua Arona ma tamaitai talavou.

## Ua Suitulaga e le Auaunaga ia Faiaoga o Aiga ma Faiaoga Asiasi

Mo le tele o tausaga, e tali atu lava faiaoga o aiga ma faiaoga asiasi i tofiga ina ia asiasi atu i le fale o tagata taitoatasi i masina taitasi, tiliva atu se savali, ma fesoasoani i ai pe a manaomia. Ua tuuina atu i ai ni itula le mafaitaulia ma auaunaga le manatu faapito i lena galuega tele.

I le atiaaina ai i luga o lena tuuto, ua talosagaina ai nei e taitai o le Ekalesia ia tagata o le ekalesia ia faateleina lo latou taulai atu i le tausiga FaaKeriso mo isi, i le faaleagaga ma le faaletino (tagai

i le *Tusitaulima* 2, 3.2.3). Ina ia faamamafaina lena tausiga, o polokalama eseese o faiaoga o aiga ma faiaoga asiasi ua avea nei ma se taumafaiga tuufaatasia ua faasino atu nei i ai o le “auaunaga (ministering),” e vaavaaia e au peresitene o korama a toeaina ma Aualofa i lalo o le taitaiga a le epikopo.

### **9. O le a le “auaunaga”?**

Sa faaali mai e le Faaola e ala i faataitaiga le uiga o le auauna atu a o Ia auauna atu ona o le alofa mo Lona Tama, ma mo tagata taitoatasi (tagai i le Ioane 15:9–10). Sa Ia alofa atu, aoao atu, tatalo mo [isi], faamafanafana atu, ma faamanuia i latou sa siomiaina o Ia, ma valaaulia tagata uma ia mulimuli ia te Ia (tagai i le Mareko 8:34). A auauna atu tagata o le Ekalesia, latou te saili atu ma le agaga tatalo e auauna atu e pei o Ia [faia]—e “faamafanafana atu ia te i latou o e e manaomia le faamafanafanaga,” “leoleo lea i luga o le ekalesia e lē aunoa, ma faatasi ma faamalosi i latou,” “asiasi atu i fale o tagata taitoatasi o le ekalesia,” ma fesoasoani i tagata taitoatasi ia avea ma se soo moni o Iesu Keriso (Mosaea 18:9; MF&F 20:51, 53; tagai foi i le Ioane 13:35).

A auauna atu tagata o le ekalesia, latou te iloiloaina e ala i fesootaiga ma musumusuga le tulaga faisoo ma le ituaiga o fesootaiga latou te faia ma i latou o e latou te avatu i ai le tausiga. Latou te fefautuaai ma tuuina atu se tala i o latou taitai ia le itiiti ifo ma le faatasi i le kuata e faatatau i la latou auaunaga ma manaoga ma malosiaga o i latou o e ua valaaulia i latou e tausii. E lipoti mai e taitai nei faatalanoaga faaleaunaga i kuata taitasi; latou te le toe lipotia maia le aofaiga o asiasiga po o fesootaiga na faia ma tagata taitoatasi ma aiga. Ma le isi, e ala atu i se sootaga faaleperisitua ma tagata taitasi o le ekalesia, e fatu ai e uso ma tuafafine o auaunaga se upega o fesootaiga e mafai e taitai ona faaoga i se taimi o tulaga lamatia po o faalavelave faafuasei.

### **10. O le a le ta’uga o i latou e auauna atu?**

O e umia le perisitua e faasino i ai o ni “uso o auaunaga,” ma o tuafafine o le Aualofa ua faasino i ai o “tuafafine o auaunaga.” O le tulaga e masani ai, o le a valaauina lava i latou i o latou igoa: “Uso Ioane” ma “Tuafafine Samita.” E le ta’ua i latou o ni “faifeau (ministers).”

### **11. E faapefea ona tutusa ma eseese foi le auaunaga mai le faiaoga o aiga ma le faiaoga asiasi?**

O le auaunaga e tutusa ma faiaoga o aiga ma faiaoga asiasi i na aiga taitasi o le a i ai uso o le perisitua—uso o auaunaga—e auauna atu ma tausii le aiga po o tagata taitoatasi o loo nonofo ai iina (tagai i le MF&F 20:47, 59). O le a i ai tuafafine o le Aualofa mo tuafafine taitasi matutua—tuafafine o auaunaga—e auauna atu ma tausii o ia, ia toe faamalosi ma faamamafa atili i le auaunaga na faasoa mai e le Au Peresitene Aoao o le Aualofa lea na amata mai ia Ianuari 2018 (tagai i le “Fesootai Atu Pea ma Ia i Soo Se Taimi, i Soo Se Nofoaga, i Soo Se Auala,” *Ensign* po o le *Liahona*, Ian. 2018, 7).

Ma le isi, o nisi o mea e manaomia mo faiaoga o aiga ma faiaoga asiasi ua fetuunaia e fesoasoani ai i tagata o le ekalesia ia auauna atu ma se taulaiga sili atu i le faafetaia’ia o manaoga. E le tataua ona toe faia ni fesootaiga i taimi uma i ni asiasiga aloaia. E mafai ona faia i le fale, i le falesa, po o se isi lava faatulagaga e saogalemu, talafeagai, ma ausia. E pei ona aoao mai Elder Jeffrey R. Holland: “[O le mea] e sili ona taua, o le auala ua e faamanuiaina ma tausii ai i latou i totonu o lau vaavaaiga, lea e toetoe lava leai ma se fesootaiga na faia i se kalena patino po o

se nofoaga patino. O le mea e taua, o lou alofa lea i ou tagata ma lou faataunuuna o le poloaiga ia ‘leoleo i luga o le Ekalesia e le aunoa.’”<sup>3</sup>

I se faapuupuuga, o le auaunaga e taitaia e le Agaga, e fetuutuunai, ma e fua i manaoga o tagata taitoatasi.

## **12. E faapefea ona taitaia e le Agaga le auaunaga?**

A auauna atu tagata o le ekalesia, latou te saili atu i musumusuga ia iloa po o le a le auala silisili e aapa atu ai i isi ma faafetaia’ia o latou manaoga. Pe o se asiasiga faatulagaina ea ma ni valaau fai soo i le telefoni i se tuafafine matua e nofo na o ia e tuuina atu ai le fesootaiga na te manaomiaina? Pe o se valaaulia ea i se talavou matua ua le toe toaga mai ina ia auai i se galuega fesoasoani i le nuu o se fesootaiga sili lea ona aoga? Pe o le lagolagoina o se taaloga soka a se talavou o le a fesoasoani lea i le talavou ma ona matua? Pe o le tesi atu o se mau e tumu i le faamoemoe i se tasi o le a fesoasoani e faamāmāina ana avega? Pe o le a faaali atu ea e se tusi po o se kata po o se imeli se popolega aoga? O le a le mea e finagalo le Faaola e fai e Ana auauna? O le mauaina o tali musuia i fesili faapena ma le faaaogaina o metotia uma o loo avanoa mo le faia o fesootaiga ma i latou ua tofia i ai i latou, e totonugalemu i aoaoga musuia. Ina ia tuuina atu auaunaga FaaKeriso, e le mafai e uso ma tuafafine o auaunaga ona faalagolago i asiasiga masani po o savali ua muai fuafuaina; latou te sailia musumusuga ma fefautuaai faatasi ma tagata o le aiga ina ia tausia sili i latou ua tofia i ai i latou—e faaoga ai le taimi ma punaoa ua latou maua.

## **13. E faapefea ona fetuutuunai le auaunaga?**

Ua i ai i uso ma tuafafine o auaunaga le avanoa e fai ai mea e sili ona aoga. O e ua valaauliaina i latou e tausi atonu e le manaomia e i latou taitoatasi se tulaga tutusa o le gauaiga. O le galulue faatasi ai ma le au epikopo ma le aufono a le uarota, au peresitene o le korama a toeaia ma Aualofa e fesootai atua mea faamuamua i uso ma tuafafine o auaunaga ina ia mafai ai ona latou maua se lagona po o ai e sili ona manaomiaina i latou. E tele lava ina tuuina atu le faamuamua aupito maualuga i tagata fou, o tagata ua le toaaga mai o e atonu e sili ona taliaina, ma isi e pei o matua nonofo taitoatasi, fafine ua maliliu tane, po o tane foi ua maliliu ava. E mafai e taitai ona tofia se taitai o le autalavou i se aiga o loo i ai se alii talavou po o se tamaitai talavou o loo oo i ni luitau, ma latou te tofia vave lava uso ma tuafafine o auaunaga i ni tagata fou liliu mai. E mafai ona latou tofia soo se uso o le korama a toeaia—faitaulaga sili po o toeaia—i sea auaunaga.

I nofoaga e talafeagai ai, e mafai ona tofia se ulugalii faaipoipo i se aiga po o se tagata e toatasi. E faaopoopo atu i ai, e mafai foi e Lora ma Maia Maite ona faia ni saofaga taua e ala i le auauna atu o ni soa i tuafafine o le Aualofa, e pei ona faia e ositaulaga ma aoao e ala i le auauna atu faatasi ma e umia le Perisitua Mekisateko (tagai i le fesili 22, o loo i lalo).

## **14. E faapefea ona fua le auaunaga i manaoga o tagata taitoatasi?**

E saili atu uso ma tuafafine o auaunaga e fai mea e sili ona faafetaia’ia ai manaoga o tagata taitoatasi. O loo avanoa ituaiga uma o fesootaiga e tali atu ai i uunaiga a le Agaga ma faafetaia’ia ai manaoga o i latou o loo latou auauna atu i ai. O le faafetaia’ia o na manaoga e amata i iloiloga ma le agaga tatalo atoa ai ma le faia o se talanoaga anoa ma aiga ma tagata taitoatasi ua tofia i ai i latou. I lena talanoaga atoa ai ma fesootaiga e sosoo ai, latou te faalogo atu ai ia i latou

o loo latou auauna atu i ai ina ia mafai ona malamalama i le auala sili e auauna atu ai, o le fai soo ma le ituaiga o fesootaiga latou te manaomia, atoa ai ma le manaoga ma le aano o savali latou te faasoa atu. Ia faamautinoa e i latou e auauna atu o fesootaiga uma ma soo se tagata o le aiga, ia talafeagai.

E saili atu uso ma tuafafine o auaunaga e fesoasoani i tagata taitoatasi ma aiga e saunia mo o latou sauniga e sosoo ai, tausī feagaiga ua latou osia, ma ia ola-tutoatasi. O lenei fesoasoani e mafai ona aofia ai ma le faasoaina atu o ni savali faaleagaga ua fetuunaia i se tagata po o le aiga, e ui o le auaunaga e le o se tofiga e faaautu i le faasoa atu o ni savali. O le a le toe aofia ai i le *Liahona* ma le *Ensign* ni savali patino ina ia faaaogaina i fesootaiga faaleauaunaga.

### **15. E faapefea ona tuu faatasia e taitai o le Perisitua Mekisateko ma le Aualofa la latou galuega?**

O se tomāi ua faaleleia e auauna atu ai i isi o se tasi lea o fua faamoemoeina ma masani ai o le malosiaga faateleina o korama o le perisitua ua tofaatulagaina atoa ai ma le fua mai i le lotogatasi faatasi ma le Aualofa. E avea le auaunaga ma se taumafaiga faamaopoopoina e tasi e faataunuu ai le tiute o le perisitua e “asiasi atu i fale o tagata taitoatasi o le ekalesia” ma ia “leoleo lea i luga o le ekalesia e lē aunoa, ma faatasi ma faamalosi i latou” ma le faamoemoeaga o le Aualofa ia “faateleina le faatuatua i le Tama Faalelagi ma Iesu Keriso ma Lana Togiola; faamalosi o tagata taitoatasi, aiga, ma auaiga e ala i sauniga ma feagaiga; ma galulue i le lotogatasi e fesoasoani ia i latou e manaomia le fesoasoani” (MF&F 20:47, 53; *Tusitaulima* 2, 9.1.1).

O le galulue faatasi ma i lalo o le taitaiga a le epikopo, e maua ai e au peresitene o le korama a toeaina ma au peresitene o Aualofa ia avanoa e musuiaina ai, faatulaga ai, ma faamaopoopo ai a o saili atu e leoleo ma tausī tagata taitoatasi ma aiga. O le faamaopoopoga e aofia ai le galulue faatasi i auala nei:

- E fautua atu e au peresitene o korama a toeaina ia tofiga faaleauaunaga mo tagata taitoatasi ma aiga o le uarota. E fautua atu e au peresitene o Aualofa ia tofiga faaleauaunaga mo tuafafine o le Aualofa. I nofoaga o loo i ai manaoga faapitoa, e mafai e au peresitene o korama a toeaina ma le au peresitene o Aualofa ona talanoaina ni tofiga patino ae latou te lei faai’ugāfonoaina.
- E fautua atu e au peresitene o korama a toeaina ma au peresitene o Aualofa ia tofiga faaleauaunaga i le epikopo mo lana faamaoniga.
- Pe a manaomia, e mafai e uso ma tuafafine o auaunaga ona talanoaina tulaga faapitoa o tagata taitoatasi ma, pe a talafeagai ai, ia faafesootai o latou taitai faalekorama po o taitai o le Aualofa mo se fesoasoani faaopoopo ma punaoa.
- E fono i kuata taitasi le au peresitene o le korama a toeaina ma le au peresitene o le Aualofa e talanoaina manaoga o tagata taitoatasi ma aiga na iloaina e ala i faatalanoaga o auaunaga.
- E sosoo ai ma lena fonotaga, e fono faatasi le peresitene o le korama a toeaina ma le peresitene o le Aualofa ma le epikopo e talanoaina manaoga o tagata taitoatasi ma aiga.
- Pe a manaomia, e fefautuai faatasi taitai o le korama a toeaina ma le Aualofa faatasi ma le aufono a le uarota e faatatau i malosiaga ma manaoga na faailoaina mai faatalanoaga o auaunaga ma fai ma faamaonia ni fuafuaga e auauna atu ai ma faamanuia tagata o le uarota.



Ina ia faafaigofieina le faamaopoopoga, e taulai atu uarota i fonotaga a le aufono a le uarota ma e le toe faia ni fonotaga a komiti a taitai perisitua. O mea i le lisi o mataupu talanoaina sa taulimaina muamua i fonotaga a le komiti a taitai perisitua o le a talanoaina, pe a manaomia, i fonotaga faaumiumi a le au epikopo, aufono a le uarota, po o fonotaga faalekuata a le epikopo, peresitene o le korama a toeaina, ma le peresitene o le Aualofa.

**16. E faapefea ona maua e tagata o le ekalesia a latou tofiga faaleauaunaga?**

E fono ia taitai faatasi ma uso ma tuafafine o auauunaga—e sili lava [le fono] o ni soa—e faasoa atu o latou tofiga ma i latou ma fefautuaai e uiga i malosiaga, manaoga, ma luitau o i latou o loo latou auaua atu i ai. O lenei talanoaga e mafai ona faia i se faatalanoaga o auauunaga (tagai i le fesili 20, i lalo ifo) pe i soo se taimi e manaomia ai.

**17. O le a le matafaioi o asiasiga i totonu o le aiga?**

I le iloaina o le aofaiga, o le mamao, saogalemu, ma isi illoiloga, atonu o le a le mafai pe tino mai foi le faia o se asiasiga i aiga uma i masina uma; ae ui i lea, e taua ia asiasiga patino pe a mafai ona faia. Ina ia auaua atu e pei o le Faaola, e iloilo e uso ma tuafafine o auauunaga ia avanoa uma mo le tausiga ma fesootaiga ma i latou ua tofia i ai i latou.

**18. Pe aofia ai i le auauunaga i taimi uma le faasoa atu o se savali?**

Leai. A oo ina iloa e uso ma tuafafine o auauunaga i latou ua tofia i ai i latou, latou te iloaina o latou manaoga ma e mafai ona uunaia i latou e le Agaga Paia ia aoao atu se mataupu faavae o le talalelei. E mafai foi e se matua ona talosagaina se autu faapitoa mo lona aiga. Ae o le “savali” aupito silisili lava o le popole ma le aagalofa.

**19. E faapefea ona faamaumauina [pe lipoti atu] e uso ma tuafafine o auauunaga a latou taumafaiga?**

E le toe aoina e taitai ni lipoti o aiga ma tagata taitoatasi sa asia i se masina faapitoa. Ae, e maua e uso ma tuafafine o auauunaga se avanoa e fefautuaai ai ma o latou taitai o korama a toeaina ma le Aualofa e uiga i tulaga o i latou latou te auaua i ai atoa ai ma a latou taumafaiga faifai pea o auauunaga. O lenei fefautuaaiga faatasi e tupu e le itiiti ifo ma le faakuata i taimi o faatalanoga o auauunaga ma soo se taimi faapoopo pe a manaomia ai se fesootaiga.

**20. O le a le faatalanoaga o auauunaga?**

O se faatalanoaga o auauunaga e faia (1) e fefautuaai ai e uiga i malosiaga, manaoga, ma luitau o aiga ma tagata taitoatasi ua tofia i ai, (2) e fuafua ai po o a manaoga e mafai ona fesoasoani i ai le korama, Aualofa, po o le aufono a le uarota, ma le (3) ia aoao mai taitai ma ia faamalosiaina i taumafaiga faaleauaunaga.

Ia le itiiti ifo ma le faakuata, e fono ai uso ma tuafafine o auauunaga faatasi ma se taitai o le korama a toeaina po o le Aualofa i se faatalanoaga o auauunaga, e sili lava le fai ma le tagata, ma faatasi ai ma lana soa. O se ulugalii faaipoipo e auaua atu faatasi e mafai ona fono ma o la taitai o le korama a toeaina po o le Aualofa po o taitai uma e toalua. I le va o faatalanoaga, e fesootai atu e uso ma tuafafine o auauunaga isi faamatalaga pe a manaomia—e faafesagai pe valaau atu i le telefoni, tesi, imeli, po o se isi auala. E na o le peresitene o le korama a toeaina po o le peresitene o le Aualofa e faasoa atu i ai faamatalaga e le faalauaiteleina—pe faasoa sa’o atu i le epikopo.

## 21. E faapefea ona tausia e taitai se faamaumauga o faatalanoga o auaunaga?

E tausia e le au peresitene o le korama a toeaina ma le au peresitene o le Aualofa se faamaumauga o faatalanoaga latou te faia faatasi ma uso ma tuafafine o auaunaga. E faailoa e taitai le masina e faia ai faatalanoga ma i latou na auai ai. Latou te lipotia se soa na faatalanoaina pe afai e toatasi le sui o le soa na faatalanoaina i le gasologa o le kuata.

E oo atu i le aso 1 o Aokuso, 2018, o faafouga i le polokalama LDS Tools ma i Punaoa mo Taitai ma Failautusi i luga o le LDS.org o le a maua mo ia lipoti. O suiga i le Lipoti Faalekuata o le a maua foi i le ogatotonu o le 2018. O nisi auiliiliga mo taitai ma failautusi o le a tuuina atu i se faasilasilaga o le a aumai mai le laumua o le Ekalesia.

## Ia Faaafia le Autalavou i le Auaunaga

### 22. E faapefea ona faaafia le autalavou i tofiga faaleaunaga?

E mafai ona filifili taitai e tofia ia Lora ma Maia Maite e fai ma soa i tuafafine o le Aualofa, e pei ona tofia ia ositaulaga ma aoao i le taimi nei e avea ma soa i e umia le Perisitua Mekisateko. E faasoa mai e le autalavou a latou meaalofa tulagaese ma tuputupu ae faaleagaga a o latou auauna atu faatasi ma tagata matutua i le galuega o le faaolataga a o latou fefautuaai e uiga i lena tautua i faatalanoaga o auaunaga. E faaopoopo atu i ai, o le faaofiaina o le autalavou i tofiga faaleaunaga e faateleina ai le aapa atu e tausii isi e ala i le faateleina o le aofai o tagata e auai ai. E mafai foi ona faafaigofieina ai ma faamalositia ai nei taumafauga i totonu o aiga a o auauna atu faatasi tina ma afafine—ma tama ma atalii.

### 23. Pe tatau ona tofia faapitoa ni uso ma/po o ni tuafafine o auaunaga i se alii po o se tamaitai talavou?

Leai. O alii talavou ma tamaitai talavou o loo auauna atu i ai i latou o e o loo auauna atu i o latou aiga ma o loo tausii foi e o latou taitai o le Perisitua Arona ma Tamaitai Talavou.

**O fetuunaiga o korama e tatau ona vave faatinoina. O fetuunaiga i auaunaga e ono alu ai se taimi ae e tatau lava ona faatulagaina i le vave e mafai ai. O loo maua nisi faamatalaga faaopoopo i le [ministering.lds.org/smo](https://www.lds.org/ministering).**

*Faamolemole ia manatua o faasinoga i uarota ma epikopo e faatatau foi i paranesi ma peresitene o paranesi, o faasinoga i siteki e faatatau foi i itu, ma o faasinoga i peresitene o siteki e faatatau foi i peresitene o misiona ma itu.*

---

1. Russell M. Nelson, “Ole Atu, Saili, Tuitui Atu,” *Ensign* po o le *Liahona*, Nov. 2009, 83.

2. Tagai i le Mataupu Faavae ma Feagaiga 110: 9–12. I le fuaiupu 11, “o le faitaulaga sili” o loo faasino i se faitaulaga sili pulefaamalumalu.

3. Jeffrey R. Holland, “Sui Vaaia i le Ekalesia,” *Ensign* po o le *Liahona*, Nov. 2016, 62.